

मार्निंग डोगरी न्यूज़ बुलेटिन, समें. 09.20 Hrs

<><><><><><>

### Headlines

1. जम्मू-कश्मीर विधानसभा दे स्पीकर होरें सरकारें गी निर्देश दिता ऐ जे विधायकें दे प्रोटोकाल सरबन्धी मुद्दें गी 2 म्हीने दे अंदर नबेड़ेया जा ते आखेआ जे सदस्यें दी गरिमा ते अधिकारें दी रक्षा होनी लोड़चदी।
2. सी.डी.एस जनरल अनिल चौहान होरें चिनार कोर दा दौरा लाया ते उत्तरी कश्मीर च नियंत्रण रेखा कन्नै लगदे इलाकें च कारवाइएं सरबन्धी तैयारिएं ते सुरक्षा स्थिति दा जायजा लैता।
3. खुराक ते सार्वजनिक बंड मैहकमे दे निदेशक होरें जम्मू प्रांतै च पेट्रोल ते गैस दी दस्तयाबी दा जायजा लैने लेई बैठक सद्दी।
4. राष्ट्रव्यापी वंदे मातरम अभियान च जम्मू-कश्मीर दा पुंछ जि पैहले नम्बरै पर रेआ।
5. ते मौसम विभाग नै औंदी 10 तरीक तगर केंद्र शातस प्रदेश च मौसम गड़बड़ी आहला बने रौहने दे असार दस्से न, बरखा, बर्फबारी ते अंदी झक्खड़ दे बी इमकान।

-----  
<><><><><><>

### Speaker-MLA

जम्मू-कश्मीर विधानसभा दे स्पीकर अब्दुल रहीम राथर होरें विधायकें दे सम्मान, विशेष अधिकार ते प्रोटोकाल दा ध्यान रखने ते एहदी हिफाजत करने पर जोर पाया। उनें सरबन्धी

तरीकाकार अपनाने लेई सरकार गी 2 म्हीने दा समां दिता ऐ। उनें एह टिप्पणी विधानसभा सत्र दे खीरी ध्याड़े आक्खी। विधायक पवन कुमार गुप्ता हुंदे आसेआ चर्चा दरान इक मामला पुटेआ गेआ। उपमुख्यमंत्री सुरेंद्र चौधरी हों भरोसा दोआया जे मिम्बरें दा सम्मान अत्त लाजमी ऐ ते इस भेठा खासी तवज्जो दिती जाहग। उनें आखेआ जे जेड़े बी मिम्बरें दे विशेषाधिकार च विघ्न पांदे न, कोई कोताही बरतदे न, उन्दे खलाफ सख्त कारवाई कीती जाहग।

<><><><><><>

### CDS-Kashmir

त्रोनें सेनाएं दे प्रमुख सीडीएस जनरल अनिल चौहान हों कल श्रीनगर च चिनार कोर दा दौरा कीता ते उत्तरी कश्मीर च नियंत्रण रेखा कन्ने लगदे इलाकें च कारवाइएं सरबन्धी तैयारिं ते सुरक्षा हालात दी समीक्षा कीती। इस मौके पर बारामुला च उनें तकनीकी लिहाज कन्ने उन्नत ते नमिं तकनीकें कन्ने लैस बहुउद्देशीय कारवाइएं दी जरूरतें पर जोर दिता जिंदे च जमीनें पर, गासै च ते साइबर जगत पर बी अपना दबदबा कायम रखना शामिल ऐं उनें साइबर स्पेस ते आर्टिफिशल इंटेलीजेंस जनेइं नमिं तकनीकें रां भविक्ख दिं चुनौतिं ते खतरें कन्ने निब्बड़ने गितै तैयारिं दी सराहना करदे होई सबनें गी इनें तकनीकें ते नमिं काहडें बारै सिखलाई देने पर बी जोर दिता।

<><><><><><>

## Dy-CM Bus Stand

उपमुख्यमंत्री सुरिंद्र चौधरी हों जम्मू बस अड्डे कश नमें सिरेआ तैयार पुलै दा उद्घाटन कीता। इस पुल गी पिछले बरे आए दे हाड़ें करी नुकसान पुज्जा हा। इस मौके पर बोलदे होई उपमुख्यमंत्री हों आखेआ जे इस पुल कन्नैयातायात सरबंधी प्रोजेक्टें गी बढ़ावा थोग ते खिते च आजीविका दे मौके बेहतर होंगन। उनें लोकें दी भलाई-बेहतरी, ढांचागत विकास ते मुकामी मामलें दे हल प्रति सरकार दी बचनबद्धता दोहराई।

<><><><><><>

## LPG-Supply

खुराक, नागरिक आपूर्ति ते उपभोक्ता मामलें FCS & CA दे जम्मू निदेशक राजेश कुमार शवन हों इक बैठक लाइयै जम्मू खिते च रसोई गैस ते पेट्रोलियम उत्पादें दी स्थिति दा जायजा लैता। तेल कंपनिएं ते विकेताएं कन्नै लाई गेदी बैठक दरान उनें जमाखोरी ते कालाबजारी गी रोकने ते नेह मामलें दी सख्त निगरानी पर जोर पाया। उनें रोजै स्हाबै भंडार दी रिपोर्ट तैयार करने ते एलपीजी उपभोक्ताएं दी 100 फीसद ई.के.वाई.सी करोआने पर जोर पाया। विकेताएं गी आखेआ गेआ ऐ जे ओह घर तगर सेवा उपलब्ध करोआने दे कन्नोकन्नी कीमतें च बी पारदर्शिता गी यकीनी बनान। लोकें गी भरोसा दोआया गेआ ऐ जे एलपीजी, पेट्रोल ते डीजल दी लोडचदी मात्रा च उपलब्धता ऐ ते ओह घाबरन नेई।

<><><><><><>

## Industries-West Asia

उद्योग ते बपार मैहकमे नै बपार ते कारोबार एसोसिएशन कन्नै इक बैठक लाई ते चला'रदी पच्छम एशिया आहली स्थिति दे असर पर चर्चा कीती। बैठक दी अध्यक्षता आयुक्त सचिव विक्रमजीत सिंह होरें कीती। इस दरान उर्जा सप्लाई सरबन्धी चुनौतिएं, एम.एस.एम.ई दी बकाया पेदी अदायगी ते होर सरबन्धी मामलें दे हल दा भरोसा दोआया। उद्योगें गी आखेआ जे ओह अफवाहें पर ध्यान नेई देन ते नां गै फैलन देन। सरकार उर्जा दे विकल्पें गी बढ़ावा देने दी योजना बना करदी ऐ ते कन्नोकन्नी समेंसिर उजरत जारी करने ते केंद्र शासित प्रदेश च चीजें-बस्तें दी सुचारू आवाजाई लेई बी कम्म करा'रदी ऐ।

<><><><><><>

## Poonch Vande Matram

पुंछ जिले नै राष्ट्रव्यापी वंदे मातरम अभियान दे विशेष गेड़ च पैहली थाह हासिल कीती ऐ। इस सरबन्धै च इक समारोह डिप्टी कमिशनर हुंदे दफतर च लगगा जित्थे डीसी अशोक कुमार शर्मा होरें अफसरें गी उंटी निष्ठा ते तनदेई कन्नै कम्म करने आस्तें सम्मानित कीता। टीम दे मिम्बरें च प्रमाण पत्र बी बंडे गए। डिप्टी कमिशनर होरें सांझे जत्नें दी सराहना कीती ते इसी जिले लेई इक मानें आहली उपलब्धि करार दिता। इस दरान सबनें कम्में च उच्च मानक बनाई रखने ते राष्ट्र व्यापी भविक्ख आहले जत्नें च बी सक्रियता कन्नै हिस्सेदारी करने लेई बचनबद्धता जाहिर कीती।

<><><><><><>

## Railway Jammu Division

उत्तरी रेलवे दा नमा बनाया गेदा जम्मू डिविजन पूरी चाल्ली कम्म करा'रदा ऐ। डिविजनल रेलवे मैनेजर विवेक कुमार होरें आखेआ ऐ जे प्राथमिकता च बेहतर यात्री सुविधा, सुरक्षा, ढांचा बगैरा शामिल ऐ। उनें आखेआ जे एह इकाई हुन पूरी चाल्ली आत्मनिर्भर ऐ। जम्मू-कश्मीर च रेल राबता बेहतर होआ ऐ। बदाई गेदी सेवाएं च वंदे भारत एक्सप्रेस बी शामिल ऐ जेदे कन्ने सैलसफा च विस्तार होआ ऐ ते खिते च सुविधाएं च बड़ा मता सुधार होआ ऐ।

<><><><><><>

## LG-Easter

उपराज्यपाल मनोज सिन्हा होरें अज्ज ईस्टर दे मौके पर लोकें गी ममारकबाद ते शुभकामनां दितियां न। अपने ममारकी सनेए च उनें सबनें लेई रमानदारी, खुशी ते खुशहाली दी कामना कीती ऐ। उनें आखेआ जे प्रभु यीशू मसीह होरें गी सलीब पर चढ़ाए जाने दे बाद उंदा परतियें जी उठना इक नमीं मेद, न्हरे पर लो दी जित ते नराशा ते मयूसी पर प्रेम ते उत्साह दा प्रतीक ऐ। एल.जी होरे सबनें अग्गे अपील कीती जे ओह अज्जै दे ध्याड़े सवां प्रेरणा लेंदे होई सच्चाई, हमदर्दी, बलिदान ते निस्वार्थ सेवा जनेह मुल्लें-कट्टें गी अपनान ते केंद्र शासित प्रदेश च इक सद्भाव आहले, रमानदार ते खुशहाल समाज दे निर्माण च योगदान देन।

<><><><><><>

## Rbn. Mission

मिशन युवा पैहल दे तैहत श्रम विभाग रामबन 18 कोला 35 बरें दी उम्मी दे नोजवानें गी अपना कम्मकाज आपूं शुरू करने लेई प्रेरित करदे होई बक्ख-बक्ख स्कीमें बारें जानकारी उंदे तगर पुजा करदा ऐ जेहदे तैहत उनेंगी घट्ट सूद पर ते विजन सूद बी दोआर दिते जा'रदे ना। इस बारें गल्ल करदे होई श्रम ते रोजगार मैहकमे दे असिस्टेंट डरेक्टर अमित कुमार होरें दस्सेआ .

<><><><><><>

## Weather

मौसम विभाग दे श्रीनगर केंद्र मुजब पिछले 24 घंटें दरान पूरे जम्मू-कश्मीर च खरी मती बरखा दर्ज कीती गई ऐ। राजौरी च सबनें शा मती 61 मिलीलीटर बरखा दर्ज कीती गई ऐ, ओहदे बाद बटोत च 53 इशारिया 8 मिलीलीटर, बारामुला ते पुंछ च 45 इशारिया 5 मिलीलीटर, कटड़ा ते गुलमर्ग च 32 इशारिया 2 मिलीलीटर ते उधमपुर च 31 इशारिया 7 मिलीलीटर बरखा दर्ज कीती गई। मौसम विभाग मुजब 10 अप्रैल धोड़ी मौसम आमतौरा पर खराब गै रौहने दे असार न कीजे 7 कोला 9 अप्रैल दरान बरखा, बर्फबारी ते अंधी-झक्खड़ दा इक नमां गेड़ चलने दे इमकान न जेहदे चलदे आम लोकें टकोहदा करियें सफर करने आहले ते करसानें गी जरू एहतियात बरतने ते मौसम विभाग दी सलाह ते जानकारी गी ध्यानै च रखने लेई आखेआ गेदा ऐ। मौसम विभाग दे इक अध्िकारी मलिक मोबीन अहमद होरें आकाशवाणी कन्नै गल्ल करदे होई आखेआ .

<><><><><><>